

Gvangjsih Minzcuz Bau

ganhhau: CN45-0036 B.2019 Nd.3 Ng.20 liggaeuq geijhah nienz ndwengeih cibseiq

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3366期

Gvangjsih Damqra Sawqguh Niemhsawq Vahcuengh

Geij bi neix daeuj, Gvangjsih yungh niemhsawq Vahcuengh guh fwngzgaem, doidoengh gak hangh gezcwz baijbouh guekgya bu veij gyagiengz ganbu hagsib song saw vah youq Gvangjsih doek rag.

Gyagiengz diuyenz, laeb cieng laeb cidu. Lai fuengmient cam' aeu gij yigen genyi aen bouhmonz vah minzcuz gihcwngz caeuq mizgven lauxhangz, yenzgiu okdaiz 《Banhfap Guenleix Niemhsawq Vah Minzcuz Vunznoix Cojyouq》《Banhfap Niemhsawq Vahcuengh》《Fueng' anq Saedhengz Niemhsawq Vahcuengh》daengj vwnzgen. Boiqhab Swcigih Gaugaep Yinzminz Fazyen, yenzgiu okdaiz 《Gij Dunghcih Mizgven Haiguh Hong Sawqdiemj Bingzdingh Fazgvanh Cuengh Gun Song Vah》《Banhfap Bingzdingh Fazgvanh Cuengh Gun

Song Vah Gvangjsih Bouxcuengh Swcigih(Sawqhengz)》.

Gaenxmaenx damqra, byaij gonq sawq gonq, yungh gyagiengz aen doih fazgvanh Cuengh Gun song vah daengx gih guh diegcungbyoengq, haiguh fazyen hidungj 9 aen laeb gih si 12 aen yienh(si、gih) diegcomzyouq Bouxcuengh daengx gih doicaenh sawqdiemj niemhsawq bakgangj Vahcuengh, boiqhab Swcigih Gaugaep Yinzminz Fazyen caeuq Gvangjsih Fazgvanh Yozyen, haiguh aen ban son'gyauq fazgvanh Cuengh Gun song vah daengx guek 2018 nienzdox ceiq sang yinzminz fazyen dakhawj song aen danvih neix banh haenx, vih daezswng gij cienniebvaq caeuq cikniebvaq suijbingz aen doih fazgvanh song vah gunhawj baujcaeng rengzrdw.

Boiqhab doicaenh, cingzcek

cobouh okyienh. Caeuq Swcigih Gaugaep Yinzminz Fazyen haenqrengz boiqhab, maeuzveh hai aen hoih doicaenh hong bingzdingh fazgvanh Cuengh Gun song vah daengx gih bi 2019. Mboengqneix, gaenq guhsat hong nyinhdingh cingzcek niemhsawq naengzlig yungh Vahcuengh boux bangbouj swhfaz caeuq fazgvanh yenzngwz buek nduj Gvangjsih 12 aen fazyen 144 boux Namzningz Si Vujmingz Gih daengj, guhsat hong guh cingq mbawcingq habgek, caemhcai caenh'itbouh coihaigai laeb ndei 《Gvidingh Guenleix Niemhsawq Vah Minzcuz Vunznoix》《Gveihcwngz Guh Niemhsawq Vah Minzcuz Vunznoix》daengj gij faenzgauj cidusing mizgven niemhsawq vah minzcuz vunznoix.

(Liz Gvangjvaz)



Lozcwngz: “Cib Cejnuengx Soengqhaq” Hawj Laex Baenzranz Cienzdongj Mulaujcz Mizyinx

Ndwen 3 ngoenz 17, Lozcwngz Mulaujcz Swciyen Swbaj Cin Menzvah Cunh Mbanjsinhdung yienj ciengz laex baenzranz cienzdongj Mulaujcz ndeu, gyoengq dahsau doengz mbanj gapbaenz “cib cejnuengx soengqhaq”, ndang daenj “buh soengqhaq” doxdoengz, gang “liengj soengqhaq” doxdoengz, baenz gij gingjsaek gyaundeidei doih soengqhaq. Ciuq cam rox, bi 2012, gij fungsug baenzranz Mulaujcz ndaej liedhaej Gvangjsih buek daihsam feihvuzciz vwnzva yizcanj baujhoh mingzloeg. Ndaw doz dwg dahsau doengz mbanj gapbaenz “cib cejnuengx soengqhaq”.

(Mungz Cwnghswih/蒙增师)

Yougyangh Gih Aen Nduj Dieggoek Son' gyauq Swnjcienz Doxgaiq Fwngzguh Minzcuz Laebbaenz

Ndwen 3 ngoenz 12, aen dieggoek son'gyauq swnjcienz doxgaiq fwngzguh minzcuz Yougyangh Gih Baksak Si biengj baiz laebbaenz, neix dwg aen bingzdaiz comz senhconz caeuq doigvangq doxgaiq fwngzguh minzcuz aen nduj Yougyangh Gih.

Aen dieggoek neix youz Yougyangh Gih Minzcunghgiz caeuq Aen Gunghswih Mizhanh Doxgaiq Gunghyi Minzcuz Yajmangz Yougyangh lienzhab cauhguh, haenqrengz guh vatcimh, swnjcienz caeuq hwngfat gij doxgaiq gunghyi cienzdongj deihfueg. Dieggoek yaek doenggvaq bouxswnjcienz dinfwngz ganggej sonyinx, daengz dieglanghbaij guh doxgaiq fwngzguh daengj hingzsik, yinx engq lai vunz roxyiuj

caeuq swnjcienz vwnzva minzcuz, doi dazsang gij suijbingz dinfwngz minzcuz Yougyangh Gih, coicaenh gij dinfwngz minzcuz hwngfat miz cozyung gaenxmaenx. Doengzseiz, aen dieggoek neix lij yinx ranzungzhoh, vwnzndangcanz couhnieb daengj hingzsik, bang vunzlai gaemdawz gij dinfwngz minzcuz daegsack, hwngfat daegsack canjnieb, laisou baenz miz. Seizneix, bouxguhong aen dieggoek neix miz 23 boux ranzungzhoh, 11 boux vwnzndangcanz. Gyoengqde baengh guh doxgaiq fwngzguh minzcuz, gaijgez le gij vwndiz souhaej.

Yougyangh Gih muhmeh, ndangdaenj minzcuz vunznoix daengj gij dinfwngz cienzdongj lizsij gyaeraez,

vwnzva goekdaej laegna, doxgaiq lai yiengh gyaundeidei, gig miz daegsack minzcuz deihfueg, dwg dingz gapbaenz youqgaenj vwnzva cienzdongj maenhndei Yougyangh Gih. Yougyangh Gih yaek yungh laebbaenz dieggoek son'gyauq swnjcienz guh seizgei, gyalai ligdoh bangfuz gij canjnieb fwngzguh minzcuz, cauh binjbaiz minzcuz, saedyienh doxgaiq minzcuz laebdaeb, cangqheiq, gohyoz hwngfat, caemhcai doenggvaq haenqrengz senhconz, yinx engq lai vunz minzcuz vunznoix daegbied dwg bouxcoz bae dieggoek hag dinfwngz, hawj engq lai vunz roxyiuj vwnzva “muhmeh” Bouxcuengh.

(Cinz Yinhlungz)

SIUSIK DINJ

● Bi 2018 doxdaej, Nanzdanh Yen ok daiz gij cwngecwz hawjndei, haenqrengz ciu giyez yinx ngaenzcienz, yungh gij fuengsik “cingj haeujdaeuj”, gonqlaeng yinx daej 3 aen cangjdenswj, 2 aen cangjubhvaq dieg fatdad haeuj youq diegsuen canjnieb banggunz Bazhih, aen diegsuen neix yungh vunz cungjsoq dwg 2000 boux, hawj bang vunz ranzungzhoh senj dieg buen ranz youq bakdou ranz ndaej couhnieb.

(Fuz Lungzgyangz)

● Ndwen 3 ngoenz 14, Aen Soj Saedhengz Vwnzmingz Seizdaih Moq Daanh Yangh Vanzgyangh Mauznanzcuz Swciyen cujiz bouxgagnyienh haiguh aen hozdung cawjdaez ciet ndaem faex bi 2019 “hwng suijli, ndaem faex ndei, bang vut gungz, leih beksingq”. Doenggvaq baez hozdung ndaem faex neix, hawj caezgya caeuqfaenh daengz hengzdoengh caemh hwnjguh gyaranz saekheu, vih doi-doengh hwnjguh swngghai vwnzmingz ok rengz.

(Veiz Yui)

● Ndwen 3 ngoenz 13, 14, Dasinh Yen cujiz lauxhangz nungzyezgiz ndaw yienh bae daengz Cenzmingz Cin haiguh son'gyauq dinfwngz ndei yungh ndaem hing, dawz son'gyauq gohgi soengq daengz gyang reih gyang naz, ndaej daengz vunzlai haenhndei. Ciuq cam rox, miz 150 lai ranz vunzlai gungzhoh caeuqfaenh le baez son'gyauq hagsib guh 2 ngoenz neix, doenggvaq son'gyauq gyalai gij saenqsim caeuq gietsim vunzmbanj vut gungz baenz miz.

(Liengz Gveivah)

● Ndwen 3 ngoenz 12, Denzyangz Yen geij bak boux ganbu ginzcung caez youq Vujcunh Cin Bahmouj Cunh Mbanjgyahsi haiguh aen hozdung cawjdaez “daengxcuengq yivu ndaem faex · bangrengz lajmbanj saenqhwngh”, caez ndaem roengz faexraeu, faexcoengz, faexmakdauz daengj dinfaex 1700 lai go, vih cauh lajmbanj swyenz swngghai bya heu raemx saw dwk roengz giekdae maenhsaed.

(Ganh Linz)